

Kontuola

ANTZUOLA / Egubakoitza / 2004eko irailaren 3a / 212. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Abuztuan hasi zituzten haurtzaindegia egokitze lanak Herri Ikastetxean

AINZANE IRIZAR

Uztailean aurreratu genizuen moduan, herrian haurtzaindegia jartzeko prozesua aurrera doa; lanak irailean hastekoak ziren arren, azkenean, abuztuan hasi zituzten. Udaleko arduradunen asmoa da otsailerako martxan jartzea haurtzaindegia.

Uztaileko osoko bilkuran, haurtzaindegia eraikitze lanak esleitzeko baldintza pleguak onartu zituen udalbatzarrak. Lan horiekin irailean hasteko asmoa azaldu zuen Udalak orduan. Azkenean, baina, abuztuan hasi dituzte lanak. Horrela, eskolak hasi aurretik lanik zaratsuenak eta zikin handiena sortzen dutenak bukatuta egongo dira. Otsailerako haurtzaindegia zabaltzea espero dute Udaleko arduradunek.

Herri Ikastetxean bertan kokatuko dute haurtzaindegia, oraingo eraikinari atxikita, jolas-tokiaren ondoan.

Haurtzaindegiaren egokitzapen lanak Udalak hartu ditu bere gain; 300.000 bat euro inbertituko ditu horretan. Haurtzaindegiaren kudeaketaz eta hornikuntzaz, berriz, Haurreskolak Partzuergoa arduratuko da.



Abuztuan ekin zieten lanei, eskolak hasterako lanik handienak bukatuta izatearren.

AURREMATRIKULAZIOA

Haurtzaindegia 0 eta 2 urte bitarteko herriko umeendako zerbitzua eskainiko du. Bi gela egongo dira: 0 eta 1 urte bitartekoendako gela bat eta 1 eta 2 urte bitartekoendako beste gela bat izango dute.

Plaza mugatuak izango ditu haurtzaindegia eta herriko bertako umeek izango dute lehentasuna. Txikienen gelari dagokionez, zortzi bat umerendako lekua egongo da. 1 eta 2 urte bitarteko umeen gelari dagokionez, berriz, hamabi bat ume hartuko dituzte.

Esan bezala, haurtzaindegia otsailerako martxan jartzea da Udalaren asmoa. Horretarako, irailean bertan edo urrian zabalduko dute umeak aurrez matrikulatzeko epea. Egunotan erabakiko dituzte epe horiek eta herri-tarrei jakinaraziko diete.


HERRITARREN HITZA / Joseba Lezeta • Kazetaria

Olinpiar Jokoak eta Debagoiena

Antzuolak ez du kirolaririk izan Olinpiar Jokoetan. "Normala", esango duzue, arrazoiarekin. Ezta Debagoienak ere. Eskualde txikia gara, baina baita ekonomikoki oso garatua ere. Zumarragako Susana Fraile eta Mutrikuko Jon Belaustegi eskubaloijokalariak dira Atenasen izandako gipuzkoar kirolaririk gertukoena. Ez da arduratzeko moduko gabezia, kirolak alderdi asko ditu, baina aipatzeko geratzea ez da bidezkoa. Eskualdean kirolaren ardurarik duen norbait baldin bada, kontuan hartu beharko luke

behintzat. Erronka polita da datozen lau urteetarako.

Honekin lotuta, beste gai bat jar daiteke mahai gainean. Merezi ote du eskualdean goi mailako kirolari bultzada ematea, gora egin dezaketen gazteei laguntza ekonomikoa eta baliabideak ematea ala lan horiek Eusko Jaurlaritzaren, Diputazioaren eta Kirolgiren esku laga behar dira?



"Debagoienak, EAEko laugarren hiriak, ez du goi-goi mailako kirol talderik"

Debagoienak, Euskal Autonomia Erkidegoko laugarren hiriak, ez du goi-goi mailako kirol talderik. Beharbada, egokioa litzateke, hain eskualde txikian, banakako kirolak bereziki bultzatu eta taldeetakoetan beheko mailak jorratu, behin edate batera heldutakoan beste irtenbide bat emateko. Baina hutsari buruz berba egitea da nire ariketa

hau. Aitortzen dut. Izan ere, nik hala uste dut, beste lehentasun batzuk ditu Debagoienak. Enpresek indartsu jarraitzea, garraio bideak hobetzea, herrien arteko loturak sendotzea, Unibertsitatea eta zerbitzu eskaintza handitzea hobe da. Ziur. Debagoienari buruz ari garenean horretaz jarduten dugu. Inor ez da ileei tiraka hasiko Pekinen lau urte barru eskualdeak kirol ordezkariak ez badu.

Bitartean, Tourrean Euskaltel taldea animatzera joango gara autobusez, tripak majo beteta.

LABUR

Finalista Eguna ospatuko dute etzi, domeka, Trekutzen

Urtero egiten duten moduan, Arrola mendizale elkarteak Finalista Eguna antolatu dute iraileko lehen astebururako. 09:00etan plazatik irtengo dira, eta Irimo ingurura ibilaldia egingo dute. Ondoren, salda eta txistorra banatuko diete Arrolakoek parte-hartzaileei.

Irailaren 11n eta 12an, berriz, Erratzuko kanpinera joango dira Arrolakoak. Hantxe, bi irteera egingo dituzte, zapatuan eta domekan.

Gaztegunea gaur, egubakoitza, irekiko dute

Gaztegunen lokala gaur, egubakoitza, zabalduko dute, abuztuan itxita egon eta gero. Lehenengo bi asteburuetan, gainera, egubakoitz gauetan ere zabalduko dute, 21:00etatik 23:00etara. Zapatuetan, 16:00etatik 20:00etara eta 21:00etatik 23:00etara egongo da zabalik; domeketan, berriz, 16:00etatik 21:00etara.

Bestalde, aipatzekoa da lokala txukuntzen ere hasi direla; besteak beste, egoitza margotu dute eta hainbat altzari jarri dituzte.

Sagastin sute txiki bat izan zen aurreko astean

Aurreko asteko martitzenean sute txiki bat izan zen Sagasti auzoan, orain dela gutxi bukatu dituzten etxebizitzien atzeko aldean. Sutea eragin zuena zein izan zen ez dakite; etxebizitzetako lanetan sortutako zerrautsak hartu zuen su, eta suhiltzaileek etorri behar izan zuten. Badi-rudi, baina, ez zutela behar bezala itzali, eta eguaztenean berriro piztu zen; herriar batzuek itzali zuten, azkenean. Udaleko arduradunek esan digutenez, obretan suak egitea debekatuta dute.

KIROLA

Lau futbol taldeak osatzea lortu du, azkenean, Antzuola Kirol Elkarteak eta dagoeneko hasi dira entrenatzen

AINZANE IRIZAR

Nahikoa lan izan dute Antzuola Kirol Elkarteak arduradunek futbol taldeak osatzeko. Erregional mailako taldea osatzea lortuko ote zuten beldur ziren, baina, azkenean lortu dute. Orain, entrenatzaile beharra dutela azaldu digute elkarteak arduradunek.

Oraingo asteko martitzenean izan zuten erregional mailako kideek denboraldiko lehen entrenamendu saioa. Denboraldiko lehen partidua, berriz, irailaren 19an izango dute.

Kostata, baina, lortu du Antzuola Kirol Elkarteak erregional mailako taldea osatzea. Dena dela, oraindik ere dei egin nahi diete futbol jokalaria izandako herritarrei taldean sartu daitezela. Aurtengo denboraldian Bergarako sei jokalaria izango ditu talde antzuolarrak; jokalaria horiek talderik gabe geratu dira, BKEk erregional mailako taldea kendu egin du-eta. Honako hauek dira jokalaria bergararrak: Martin Zaitegi, Manex Altuna, Alex

Abajo, Aitor Blanco, Jabi Berrando eta Andoni Ibaibarriaga. Momentuz, entrenatzaile bakarra du talde nagusiak, Gurutz Zabalo, hain zuzen ere.

Gazte mailako taldea ere hasita dago entrenamenduekin; abuztuaren 25ean, hain zuzen ere, ekin zieten denboraldi berriko entrenamenduei. Pablo Olalde eta Gaizka Asensio izango dira aurten ere gazteen entrenatzaileak.

Kadetei dagokienez, Mikel Larrañaga arduratuko da aurten gazteenak entrenatzeaz.

NESKEN TALDEA AURRERA ATERA DUTE

Azkeneko momentura arte zaltzan egon dira, baina, azkenean, nesken taldea ere lortu dute aurrera ateratzea. Jokalari gehienak iazko denboraldikoak izango dira, baina, badaude jokalaria berri batzuk ere.

Nesken taldean orain duten arazoa da entrenatzaile ez duteela. Hala ere, Jose Angel Fernandez arduratuko da taldea entrenatzeaz, entrenatzaile berri bat topatu bitartean.

Jose Angel Fernandez AKEko presidentek adierazi digu-




Martitzen arratsaldean egin zuen lehenengo entrenamendu saioa erregional mailako taldeak.

nez, horixe da orain duten arazo handiena: entrenatzaile falta, alegia. Izan ere, kadete mailan, entrenatzaile bakarra dute, Aritz Sai-

dik taldea laga eta gero; erregional mailako taldean antzeko zerbait gertatzen da: Gurutz Zabalo bakarrik dute, eta esan bezala,

nesken taldearendako ez dute entrenatzailearik topatzen, Iratxe Azkargortak kargua laga behar izan duelako.



Erretiratuen lokala, berrituta

Erretiratuek Zurrategin duten egoitzan hainbat berrikuntza lan egin dituzte abuztuaren zehar. Ikasturte berri-rako, toki atseginagoa izango dute herriko erretiratuek. Besteak beste, hormak margotu dituzte, estraktorea jarri dute, sukalde txiki bat egokitu dute harraska eta guzti. Hozkailua eta mikrouhin-labea ere jarriko dituzte.

Azkeneko aste honetan, berriz, lanak bukatu ondoren, egoitza garbitzen eta txukuntzen ibili dira erretiratuek eurak./A.I.

LABUR

Aerobik ikastaroetan izena emateko epea zabalik dago irailaren 10era arte

Urtero moduan, aerobik ikastaroa antolatu du Antzuolako Udaleko Kirol Sailak. Dagoeneko zabalik dago ikastaro horretan izena emateko epea. Irailaren 1ean zabaldu zuten epea eta hilaren 10era arte egongo da zabalik. Interesatuak informazio gehiago lortuko dute udaletxean bertan, eta izena emateko ere hara jo beharko dute.

Abuztuko ordutegi berberarekin jarraituko dute mezek, apaiza sendatu bitartean

Uztail bukaeran gaixotu zen Rafael Eizagirre herriko parrokoa. Gauzak horrela, abuztuan Bergarako San Pedroko parroko Fidel Eizagirre, Rafaelen anaia, arduratu da Antzuolan mezak esateaz. Zapatuetan 19:30ean eta domeketan 11:30ean izan dira mezak hilabete osoan. Uzarragako elizan, berriz, ez da mezarik egon. Irailean ere ordutegi berberarekin jarraituko dute, parrokoa sendatu bitartean.

LARREA
TABERNA
Kalebarren 17
ANTZUOLA

ANTZUOLA
Apainketak eta
isolamenduak
Pladurrezko dibisioak
Kalegoi 21 ANTZUOLA
676 997 400
Biltegia: 943 78 70 40

Tomas Gezalaga
Zoruen kutxilatua
eta
bernizatzea
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta
gozotegia
Buztinuzuri 13 ANTZUOLA
Tel.: 943 78 70 32

Tomas Gezalaga
Apainketarako eta
industriarako pinturak
•
Paper margotuak
•
Moketak eta tapizatuak
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA